

清代宦臺人文獻選編 第一種

釣璜堂存稿 (二)

徐孚遠
撰

卷三

釣璜堂存稿卷三

懷舊樓叢書

華亭徐孚遠閣公父著

孫男懷瀚謹錄

五言古詩二

同文生粹伯年卿游虎谿

仲春卉物佳結友欣所適杖策出東郊緣崖涉廣陌連岡
互登頓屣步遞扶掖豁然兩扉開俄已陟山脊仰眺壘壁
雄俯瞰複洞窄洞闢自何年山乳久已滴陰窞襲人裾整
襟問巾幘童采澗頂椿僧掃巖上石雜坐進芳新何用錦
茵藉日晴薰風來習習披我腋鯨勢忽飛動欲吸滄流碧
賦形各有繇潛躍理不隔余復何所爲栖栖久于役浮白

偃松陰放歌聊一息

懷梁隆吉

伊昔到昌國小隱性所便未能事軍府常持一釣竿不知
何帝子建號來此山羣公執玉帛列坐盡貂蟬奪我芟荷
衣著我舊日冠強出非所志誓死願投閒故人有梁子授
我郭外廬插籬爲圃逸移松開徑偏黍酒時相勞童稚戲
階前君亦喜孤潔對之神穆然爾來久契闊高風何時攀
苦無南來雁音書誰與傳

贈紀石青

伊余喜通達雅慕嵇與阮縱心山水間屢游不知反親朋

或命酒在處成讌衍我友有紀子性不過人飯春來已七
旬寂寂戶常鍵風吹澗草香日映山花晚獨行世所希取
適在文苑時或賦思玄不知甌塵滿尙想企高蹤行行如
陟嶽

同諸子游虎谿因念丙戌冬官傅張觥淵曾攜余游
此感而有作

憶昔張官傅避跡亦南奔殷憂不能解攜朋游此山是時
冬始交芳草猶未殘一徑羣峰秀疊壁石盤盤其下有複
洞掃洞列盤餐觴酌再三舉四坐起長歎俯瞰此島外戎
馬浩漫漫故鄉在遠道何由生羽翰今我復來游同游皆

朱顏展義曠以達青雲若可攀歡往感亦隨念舊獨潛潛
張公仗大節去矣如龍驚徒存杖履迹遺風良不諼

出門行

出門何所適登高以徘徊攬衣顧形影悲風淒然來言念
故鄉友白骨已成灰遠道不可致何由薦金罍憶昔寶與
灌意氣凌九垓盛衰相依倚片語無嫌猜雖乏知幾哲同
盡亦堪哀如何攜手交俯仰失中懷嗟彼投林鳥音響亦
啾啾今我思存沒殷憂不可裁

詠懷

建炎旣南渡神州若逝波聞有馬宣諭揮戈回日車皇弟

方開府父老望中華勢孤難久持眾散徒咨嗟過江不見
錄流落空山阿自知致身晚矯首看青蘿勳業誠契闊於
義亦無訶事人苟不終大節當如何

伊昔方龍鬬袁曹迭盛衰官渡一以蹶河北氣乃摧所尙
者奇智孰云勢不移乃知苟與許去就係安危羣策苟不
用事往悔可追時無英雄人高賢誰見知行歌聊自託空
山多紫芝

西蜀劉子初東吳虞仲翔名高不偶俗持論多激昂二主
久不平隱忍不敢傷當時彭與暨抱才誠亦良一朝觸世
網相隨齒劍鋌任遇各有殊否泰亦可量赤霄有玄鶴高

岡有鳳凰本無適時用舉翮道路長鐘鼓無所慕弋者亦
相忘誓將希往哲養性以徜徉

出門望四野哭聲從東來借問彼何人亦有適俗才穴金
藏不已鬼伯乃相摧家仍列鼎食其骨委黃埃我聞物貴
身富厚乃爲災神龜喜曳尾社木養不材據圖而刎喉愚
者所徘徊以茲謝世事面壑臨高臺秋風或有託去就復
何猜

客子苦飄蓬羈旅依主人既慮主人憎又慮主人親激烈
固基禍委蛇亦失身行已疏密間徘徊多苦辛我思邵根
矩俯仰不失真雖嘗游朱戶矯矯不可馴自愧非其才微

志何能伸所願數畝宅負耒淥水濱買山猶未得進退兩
逡巡

懷吳鑑在

憶昔避難初相逢在橋李浪迹五湖濱微命其如螳蜂火
燼余舟流矢及君趾故鄉各渺茫共赴新安壘暮雨蕭寺
糜秋風客邸被褰衣層岡峻漱齒山東訛稅駕不一旬蒼
黃問車軌閩南開帝圖金臺復高峙聊試武城絃俊翮凌
雲起從茲各有役不得同杖履泊余賦滄浪波濤幾千里
徘徊想音容何時寄雙鯉此間到蒼梧繡斧百城裏王命
再三錫長途駕騷駢顧盼列九卿追風不踰晷而我方栖

遲觸途有荆枳去年附書人逝矣如流水懷情不可宣望
遠一徙倚

卽事有懷

首夏風物和況當浴佛辰相將攜朋侶游步青山濱晨炊
未及熟喧呼闔城圍聞當掩越逸搜索及比鄰借問逸者
誰云是幕下賓頗好縱橫術談說輕儀秦偶時擅權利賄
厚乃邁迤夙有鼎烹志豈復謀其身所以好棲遁夢想在
松筠請謝當塗客來依沮溺人

偶題

吾思古哲人亦各有丘樊羅含洲上宅杜甫浣花村清軒

蔽風雨卉石娛晨昏所以懷高尙沒身不可諉而我去故鄉流離託草根往來南北海何時成小園每每行阡陌頗見禾黍蕃便欲躬桔槔夢想若飛翻斯願恐難遂默塞又何論

昔日劉景升清嘯臨荊州雖無霸王姿坐撫亦已優況列顧廚中俯仰多名流觀其製文啟斐然作者儔如何禰處士偃蹇不能留豈必主道乖流放亦有繇旣不堪簪紱便須狎野鷗何爲在客幕自矜意氣適隳形故驚眾誕詞若決溜所以蕙草殘永爲千古愁

同諸子石青齋讌集紀懷

斯人南海秀婉變在空谷持身必典型遠俗神肅穆晨暨
二三子蹊行披其幄塵凝更湛如羣書森滿屋雜坐芳樽
開展論無齷齪懷彼漢季士高軌何能續孫曹固多才諸
葛真如玉遂令名士歎千載猶嶽嶽不知日影移佳言遞
往復歸途眺層岡餘言在心曲世事方變通勉旃善自勛
石青以養兌處潛見勛作此以當書紳

我生喜豁達交情無薄厚懷意恥囁嚅是非紛然剖行己
三十年盡言亦罕咎爾來南海濱適當亂離後世事不可
測荆棘固多有諒哉石青子戒我兌其口況在乾爻初保
身良非偶人苦不自知多君能善誘從此凜如冰養默以

自守臧否付秋風豈曰藏山藪庶幾寡悔吝持以報我友
贈張玄箸

高才不可作恢豁嘯滄溟吾子扁舟至今我見生平清秋
挈鷹隼瀚海飲長鯨遺我詩三篇字字珠璣傾緘之氣浮
動朗詠神以清比來日有製燦燦飛瓊英道大波瀾闊豈
惟筆墨榮王明汲泉源顧盼凌公卿瑚璉君子器安步影
冠纓軍符雖易取請勿再受兵子房一借籌可以驅韓彭
廟謀乃鼎足力用古所輕我衰子方壯萬里看升騰

南園讀書樓

陸氏構此園冉冉數十歲背郭面良疇緩步可休憩長廊

何繇延複閣亦迢遞高樓多藏書歲久樓空閉丹漆風雨
摧山根長薛荔我友陳軼符聲名走四裔避喧居其中干
旄罕能戾招余共晨昏偃蹇搜百藝徵古大言舒披圖奇
字綴沿隄秋桂叢小橋春杏麗月影浮觴罍荷香落衣袂
心賞靡不經周旋淡溶滴豈意數年來哲人忽已逝余復
凌滄波襲懷不可繼既深蒿里悲還想華亭唳他時登此
樓眷言申末契

閒居

天時已暑熱我友皆閉戶或乃事戎行晨夕趨軍府今我
無所爲蕭然此環堵堂下馴鴿行階前金鳳吐羣物各有

適羈人無處所何以遣愁疾援筆徵今古時作蘇李吟長
歌聲激楚

自居滄海中所見多瑕釁古來棲隱地今時金鼓震勢均
乃相圖往往互推刃朝華暮已落有似綠籬薜英人據要
津達士安徽命榮悴各有殊所願寡緇磷揮手弄煙霞庶
幾免厄運

憶昨夢歸家茫然失生計敝廬狐兔走桑麻儉無歲慘戚
少歡顏寤寐亦狼狽平昔思故鄉故鄉難倚賴緣知失業
徒往往無根蒂所以聚山藪眈眈互吞噬快意須臾間至
死擅權勢伊余非此流尙想烟霞際必若遇王明或亦刷

鳳翽不然數畝田耕鑿從此逝

出郭

出郭何所之登山眺蒼翠行行不覺遠乃造遠公寺踏青
者何人車馬紛然至麗服繡諸于云是貴人嬖躡躔過精
廬游展皆趨避游人勿歎息乘時良不易昔日石家妹今
作孫家媚色娛須臾閒鬼妾遞相寄達人鏡其源超然有
高致

懷古

海上少詞筆唱酬亦不數復恐生病癰連朝扇我戶白日
靜冥冥欹坐檢今古旣怪方朔諧彌傷馬遷腐一賢實奇